

Derita bisa ulat bulu laut

Sinar Harian 26/2/2019 M/S 21

Doktor saran
kaki Hamizi yang
bengkak dan
bernanah
dipotong

ROHANA ISMAIL

TUMPAT

Penyakit yang dihidapi tukang rumah ini dikatakan terkena sengatan ulat bulu laut menyebabkan isi daging di kakinya luruh dan bernanah.

Sejak itu, Hamizi Hamzah, 39, di kampung Telaga Lanas di sini terpaksa menahan sakit kaki kanan yang berdenyut, membengkak serta nampak tulang.

Hamizi berkata, pilihan yang ada, doktor sarankan agar kakinya dipotong.

"Ini dugaan saya, saya mohon orang yang tahu rawatan terbaik penyakit ini boleh membantu saya, saya terkena ulat bulu laut ketika mencari tiram dua bulan lalu.

"Saya tiada penyakit kencing manis," katanya ketika diziarahi Adun Pengkalan Kubor, Wan Roslan Wan Hamat.

ULAT BULU LAUT

■ Chloea flava, juga dikenali sebagai ulat bulu laut, adalah sejenis cacing annelida polikaet yang dimiliki keluarga Amphipomidae. Ulat bulu laut mempunyai badan yang memanjang, saiznya antara 7-10 cm panjang dan 1.8-2.5 cm lebar, tidak termasuk bulu.

■ Insang-insang kecil, antara warna putih dan coklat, berada pada kedua-dua bahagian luar di belakang bulu dan hampir semua segmen. Tubuh dililiti dengan duri berkapur iaitu seta, dan mempunyai rambut putih yang halus, tajam dan berbisa.



Menceritakan kejadian itu, Hamizi turun ke lagun di Kampung Jubakar Pantai mencari tiram untuk makan malam keluarganya.

Katanya yang bekerja sebagai tukang rumah, ketika di dalam air separas dada, dia merasakan seperti ada anak ikan bermain-main di kakinya.

"Tiga jam saya berada dalam air lagun itu mencari tiram, banyak kali jugalah saya rasa seperti anak ikan merayap di kaki tetapi saya tak syak apa-apa, lagi pun saya pakai stokin," katanya.

Menurutnya, selepas naik ke darat, tiada apa-apa yang pelik di kakinya namun kesokan harinya ada keluar bisa di parut lama di jari kaki.

"Kaki saya tiba-tiba menjadi lebam kebiruan, semakin membengkak dan terus dirujuk ke Hospital Raja Perempuan Zainab II (HRPZ II)," katanya.

Menurutnya, dia kini perlu mencuci sendiri kakinya dan sebulan sekali perlu dirujuk ke HRPZ II, namun terpaksa membongeng motosikal dihantar oleh isteri,

Siti Nurul Ain Supian, 30.

"Saya terpaksa membongeng motosikal dengan



kaki nampak isi daging untuk ke HRPZ II.

"Sakit itu hanya Allah sahaja yang tahu namun saya perlu kuat.

"Kereta buruk kami rosak, nak sewa kereta, tambangnya mahal," katanya.

Menurutnya, dia hilang punca pendapatan sedangkan perlu menanggung tiga anak yang masih bersekolah dan sewa rumah RM120 sebulan serta ansuran motosikal.

Katanya, makan minum keluarganya kini hanya mengharapkan sedekah orang ramai yang datang menziarahinya kerana isteri tidak bekerja.

Sesiapa yang ingin membantu boleh salurkan ke dalam akaun Maybank Hamizi 153092090412 atau hubungi di talian 0199993534.



Isi daging kaki Hamizi luruh, bernanah dan bengkak.



Rumah sewa yang didiami Hamizi lima beranak di Kampung Telaga Lanas.